



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim




tir yimyim

TAPAK 7

**Iga Swiatek-i Korea
Open kokogo**

**Nepal nung Gen Z teloki KP
Sharma Oli aputsü akhanger**



VOL. XXII ISSUE NO. 339 (ADOK 339) DIMAPUR TENTONÜ (MONDAY) RONGJUI (SEPTEMBER) 22, 2025 ₹ 5.00

Along-i scholarships yakta agütsütsü nangzük

Kohima, September 21, 2025 (TYO): Nagaland nung kaketshirtem asoshi post-matric scholarships magütsüi aliba yakta agütsütsü ta Higher and Technical Education Minister Temjen Imna Along-i ashi.

Minister Along-i pa indang official residence nung osangbener den jembidang scholarship indang mezüngbuba shilem ita ishika tejakdang agütsüogo saka kaketshir aikati tanabuba shilem atar ta ashi.

Department-i Union Ministry of Tribal Affairs dang nungi post-matric scholarship indang central share meshidar ta pai ashi.

Ministry-i September 15 nü 2024-25 atema expenditure & requirement indang statement meshi aser ibaji department-i agütsüogo ta Along-isa ashi.

Ministry nungi kobi melii Nagaland nem central share

agütsütsü imlar aser iba sülen Department-i tanüngba kaketshirtem nem scholarship agütsütsü ta paisa ashi.

All Nagaland College Students' Union (ANCSU)-i department nung common scholarship cell ka amenoktsü akhangba atema "Chief Secretary Sentianger Imchen lenisüba kübok sorkari taoba nung line departments ajak dang scholarship onüktem ka akümtsü tetuyuba agütsüogo" ta Minister Along-i langzü.

Tanga department tem den scholarships dak sendakba mapa amalitepa inyaksü atema Higher Education Department kübok dedicated scholarship cell ka amenoktsü inyakdar, ta pai ashi.

"Ni iba mapa nung tenük yokdar aser tekaratiba nung tembangtsü atema merangdar" ta Along-isa shisem.

UK, Canada aser Australia-i Palestinian State agizüker

New Delhi, September 21, 2025 (Agencies): United Kingdom, Canada, aser Australia linüktemi Deobarnü Palestine ya linük balaka ta agizükba sangdongogo aser iba ajanga parnoki mapang talangka United States den Israeli-Palestinian ken o atema külemi aruba nungi pilar.

Linük 140 temai Palestinian statehood agizüka lir aser UK-ia Deobarnü parnok den külemi adener. Tan hopta New York nung United Nations General Assembly alidang ano tanga linüktemi Palestinian statehood agizüktsü imlar.

UK Prime Minister Sir Keir Starmer-i pa indang official X account nung "Middle East nung yimjung mesamadaktsütsü atema iba lemtet ya agitsüsa aküm" ta ashi.

"Middle East nung tensa mejungi akümba mapang, onoki yimjung alitsü aser two-state solution atema noktaker, iba ajanga Israel-i Palestinian state ka anasa lendong nungi jenbua alitsü" ta Starmer-i ashi.

"Yimjung aser two-state solution teimla asentenshitsü atema ni iba linük nung prime minister ka ama United Kingdom-i Palestine agizüker" ta pai metetdaksü.

UK-i taküm July ita policy melenshiba sülen PM Starmer-i iba sangdong agütsür. UK policy nung ceasefire, Gaza dangi humanitarian aid teimba yoktsüba, West Bank annexation magizükba, aser yimjung maparen inyaksü dena lir

G7 linüktem rongnung Palestine state mezüng agizükba Canada lir aser Deobarnü parnoki iba osang metetdaksü.

"State of Palestine aser State of Israel atema tarutsü tajung imlar" ta Prime Minister Mark Carney-i ashi.

Iba sülen Australian Prime Minister Anthony Albanese-ia two-

state solution atema maparen akangshitsü atema joint international initiative nung shilem ka ama par linüki Palestine statehood agizükba metetdaksü.

"Iba nung Gaza nung ceasefire alitsü aser pua alirtem ajak chioktsü" ta PM Albanese-i Foreign Minister Penny Wong den joint declaration ka nung ashi.

Palestine nung taruba sorkar ketdangsübaren aser security maparen nung Hamas shilem kecha mali ta Australia-i metetdaksü.

Ramallah nung Palestinian Foreign Minister Varsen Aghabekian Shahin-i item osang pelashishia agizükba metetdaksü.

"Iba ya onok sasa ketdangsüa aotsü aser nüjiso angutsü anasai bentsür arur. Iba ajanga asüng rara metembangtsü akok saka mapa tajung tejakleni aotsü" ta Shahin-i ashi.

Ajisüaka Israel-ibo item lemtettem aitsüogo. Palestine statehood agizükba ya tensa den meputep aser tajung kecha madoktsü. Palestinian statehood ya sangdong agütsüba ajanga masü saka indangindanga jembitep nung ang ataloktsü ta Israel ketdangsürtemi ashir.

Iba mapa ya Hamas asoshi sempet ka lir ta Israeli Foreign Ministry-i metetdaksüogo.

"Palestine statehood agizükba ya jihadist Hamas asoshi sempet ka aser iba ya UK nung Muslim Brotherhood den yaritepertemi tashi itdaksür. Hamas tanishirtemi ibaji ototia ashir, iba ya October 7 tatalokba atema sempet ka lir" ta Ministry-i ashi.

US President Donald Trump-ia mepelaba metetdaksüogo. Tawa pai UK semdangdang lemtet magiteta onük kar rongnung iba ya ka liasü ta Trump-i ashi.

Ajisüaka, UK Prime Minister Starmer-ibo iba lemtet ya Hamas pusemtsü atema agiba masü ta metetdaksü.

Kaziranga Universitynung Nagaland kaketshirtem lendong nungi jenbua lir

Kohima, September 21, 2025 (TYO): Assam kübok Kaziranga University, Jorhat nung azünger Nagaland nungi kaketshirtem lendong nungi jenbua lir ta Higher and Technical Education Minister Temjen Imna Along-i Deobar aonung ashi.

Honibar aonung Naga kaketshir kati asür Assamese kentener Zubeen Garg indang tim mesüi jembiba ajanga mepetmesü adoka liasü.

B.Tech civil engineering student Lesiri S. Sangtam-i o kar mejungi jembiba agi yasüng 8:30 ako nungi anepdang 2:00 ako tashi tensa mejungi aküm ta Minister Along-i ashi.

Lesiri Sangtam ya safe house ka nung lir aser university nung Naga kaketshir 300-400 shi ka lendong nungi jenbua lir ta pai ashi.

Assam sorkar, police aser Kaziranga University ketdangpurtemi mapang shitak nung mapa inyakba aser Nagaland ketdangpurtem den amalitep aliba atema pelar ta Along-isa ashi.

"Tensa junga kümogo. Nisung telok jagi tejashi nung timtem agütsüba dak alaka yiruyibongba m mesüra lendong kecha matalok" ta Minister Along-isa ashi.

"Garg asüba atema nisungtemi mangyimba mapang kaketshiri tim mesüi jembigo.



Temjen Imna Along

Assam nung Naga nunger aser Nagaland nung alirtemi social media nung o mashii mejembitsü mepishir" ta paisa metetdaksü.

"Asen lanur kati metetsümonga mesüra memeteti aibelenogo saka tejashi mesüra tepela mapang o mashii mejembitsüla. Iba ya kanga tai, asür Zubeen Garg ya Assam nunger asoshi kanga dang tongtipang nisung ka liasü aser mebilemdangi o mashii jembibaji tai" ta Minister Along-isa ashi.

Sangtam mesüra tanga Naga kaketshirtem dak disciplinary action agitsü asü koda ta osangbeneri asüngdangdang iba onük ya tulu küma aotsüsa lir saka Kaziranga University-i temerenshi tulubo magütsütsü imlar ta pai langzü.

"Ozü lanurtemi jembiba atema sasar aser state anaprong nungi sorkartem, Mokokchung o

Jorhat nungi Deputy Commissioner tem tsüngda osang agitepdar. Tanubosangji khen atema kidangi meyipa aru nung ajungtsü. Kaziranga University nung tanüngba kaketshirtem ajak junga dang lir" ta Along-isa ashi.

University-i initial incident report aser Naga kaketshirtem lendong nungi jenbua aliba osang lemsatop. University ketdangsürtemi Naga kaketshirtem kümzüka ayuba atema pelar aser kaketshirji par kibong ket nung agütsütsü ta paisa metetdaksü.

Nagaland nunger atema Assam nunger ya adianu lir aser parnok jashiaka Naga nunger temeim angatetsü imlar ta Along-isa shisem.

Naga kaketshiri Assam nunger dang tatok mehshir

Kaziranga University nung kaketshir Liseri S. Sangtam-i Assam nunger dang tatok meshia shidi ka zülüogo.

"Ni o mashii jembiba aser Assam sensotem temulung yirutsüba atema tatok meshir. Ni asür Zubeen Garg mezüngmeshitsü tebilemba kecha maliasü. Ajisüaka ni Assam nung alir ajak dang tatok meshir" ta pai ashi.

Liseri-isa Zubeen Garg Da aser par fans ajak dang tatok meshi aser tarutsü nung ibala mapa meinyaksü nangzükogo.

Tanü nungi benjung ana tenzüker: PM Modi

New Delhi, September 21, 2025 (Agencies): "Asüng nungi benjung ana- Navratri aser GST savings festival tenzüksü" ta Prime Minister Narendra Modi-i ashi.

GST 2.0 reforms tenzüksü ghonda ishika dang lia PM Modi-i Deobar nikongdang linük ayongzüka jembidang iba osang metetdaksü.

Prime Minister-i o tenzükdang linük den Navratri salem lemsatop. "Asüng Shakti, Navratri külemba benjung tenzüksü. Ni nenok ajak dangi salem abener. Navratri mezüng anogo nung linüki Atmanirbhar Bharat atema mera tulu ka agir" ta pai ashi.

"Asüng next-generation GST reforms tenzüker. GST savings festival ka tenzüksü. Nenok savings teimba akümtsü aser nenoki osetsüsset zübazüba alitetsü" ta Modi-i ashi.

GST reforms ajanga sensaker, middle class, lanurtem, tetsürtem aser shishilembartem kanga ajangzüksü ta paisa shisem.



Prime Minister Narendra Modi

"Ni India nunger crore aika nem tenüngsang agütsür. Item reforms ajanga Bharat tejakleni aoba nung yaritsü, shishilembaba tezübaba akümtsü, investment atsür arutsü aser linük renlokba nung state shia kasa partner akümtsü" ta Prime Minister-i metetdaksü.

"Sorkari 2017 küm GST bener arutsü atema otsüsütsü mapa inyak. Küm aika nübertem

tax balala agi alenbanger liasü anungji onoki linük taginüba nung ajemdaker GST ya tongtipang kümdaktsü. Onoki sendaktepa alir ajak den jembiba aser state tem tebilemstütem angadang. State ajak teyari agia iba tax reform tulu ya mapa küma tenzüktet" ta Modi-i ashi.

GST 2.0 ajanga 12% aser 28% tax slabs agiener, aser 5% aser 18% dang amshitsü. Iba slabs ana nung luxury products mesüra sin goods dak alaka yagi items aser services ajak adentsü ta paisa ashi.

Asüng nungi coffee, ghee, amtsük aser totzü nung jenjang ajemtsü. Gari tasentem jenjang dalangba akümtsü aser medical insurance coverage atema premiums ajema akümtsü.

"Taküm küm tetenzüklen sangoktsüba income tax benefits aser GST reforms ya "double bonanza" lir. Asenoki Income Tax nung exemption aser GST ajanga savings ya bendenra public sen Rs 2.5 lakh crores kümzüksü" ta PM Modi-i ashi.

LKM-i lanur entrepreneurs ajungmesoba seminar ayongzük



Dimapur, Rongjui/Sept. 21 (TYO): Langpangkong Kaketshir Mungdang (LKM) ajanga Swavalamban Connect Kendra (SCK), IDAN Mokokchung den lungjemer CMMFI aser Bank loan subsidies dak sendakba nung seminar ka September 20, 2025 nü Changtongya Town Hall nung ayongzükua liasü.

Chuchuyimlang nung LKM 75 buba Jubilee aser Mundang amungdang pangzüng renema aliba ama Entrepreneur adokdaksüba ajanga Langpangkong aser Naga lima tematibai ajungketsü nükjitung nung iba seminar ya "Langpangkong Ajungketti" omen nung ajemdaker ayongzük.

Sentong nung LKM tir Imlinok ajanga tarur pela-a agizükba den külemi sentong nükjidong aser teyimla lemsatepba mapang, taziungba tulu den training aser skills den Tsüngrem nungi aruba shisatsü takotet bener lanur aika rongsen lenmang monguteti aliba ngua entrepreneurs adokdaksütsü asoshi iba sentong ayong, ta lemsatep.

LKM 'Clean Election' aser 'Survival Mokokchung' koba LKM ajanga tükong nung inyaker, item inyakyim takok angutsüba tanü lanur entrepreneurs nungdak aser adoktsüla, kechiyong lanur ka taküm nung pei sasa (self dependent) litet nung dang election mapang rongsen benboba samatsü aser tsümar masü saka asenok lanurtemi

shishilemba tenzüksü, ta Imlinok-i ashi.

Sorkar mapa maitür saka iba kisüing dak temulung lemer kazüba lanur takümü tamashi. Kaketshir aser lanurtemi Tsüngrem nungi anguba shisa amshia asentzü sena mapa inyaksüla. Nagaland state ya India nung zünger mapa mangu aliba (educated unemployed) tanabuba (2nd highest) jenjang nung lir, anungji iba sentong ya Unemployment anema raraba aser Langpangkong aser Naga nung lanu putu tasenbai ayaokba sentong ka lir, ta LKM tir ajangasa lanurtem ayongzük.

Iba sülen Dr. Akumtoshi Longkumer, Entrepreneur, Changtongya Town ajanga tayungzükba o jembidang, technology ainba medem taküm shia update asütsü nungdaker ta ashi aser mapa inyakba den pei kija mapa nung meranga/nendaka inyakba tetsüingta medemdanga liasü.

Takok ji dangar mapa nung dangar atema mapa inyaksüba masü saka pei mapa pei atema meranga inyakba nungi takok angur ta pai ashi.

Meimchir taküm kaji alakteta nükjidong balaka atema aruba lir aser iba nükjidongji angateta pa/lai apitetta inyaksüla ta ashi.

Business inyaker takum kaji akmesen sobutsü endoktsüla, rongsen ketdangsüba aser libaliro ajak taziokba nung alitsüla, kechiyong takokji iba nungi arur. Entrepreneur taküm kaji nükjidong teindang, züngzünger aser mera agia aotsü

renema alitsüla, ta Dr. Akumtoshi Longkumer-i lanurtem ajungshi.

Takari pei jenjang aser alima rongsen indang jembir, sensakeri rongsen makaba tebilemsü aser shisatsü indang jembir. Anungji asenok koba nung adentsü, ta pai tesentepertem dang asüngdang.

Paisa aruya aliba project balala asameyangba nung Langpangkongsanger zünger mapa mangu alir teindang lanurtem yarisema inyaksü tebilemba lemsatepa liasü.

Sentong nung Technical session ana liasü, mezüng nung shisalen sayur Imsurenla, Centre Manager, SCK, IDAN, Mokokchung aser tanabuba nung T Chubazungba Ao, Manager, State Bank of India, Tuli Town Branch-i jembia liasü. Shisalen sayur anati jembidang CMMFI loan aser Subsidies agiba indang dang masü saka tarutsü putu asoshi nükla tajung ayutsü aser pei nükjidong tulu yur LKM mangdang atalokdaksütsü asoshi meranga inyakba lanur aser taziokba nung ochishia inyakra takoktsü lenmang anasa lir, ta lanurtem ajungmeso.

Sentong nung Sentisenla menden liasü, Limasungkum, Pastor, Nagamese Baptist Church CTN ajanga Tsüngremer leniba temoatsü meshia sarasadem, Sangwa Jamir, LKM Executive ajanga O lemtepa mapang agi, Manen Pongener, LKM Executive ajanga melepzüng o jembia aser telok ajak külemi tenüingsang agüja sarasadema sentong tembang.

Officers' Training Academy atema Cadet Mensham Konyak shimogo



Dimapur, Rongjui/Sept. 21 (TYO): St. Joseph's College (Autonomous), Jakhama aser 24 Nagaland Battalion NCC, Kohima nungi Under Officer N. Mensham Konyak nem Group Commander ajanga September 20, 2025 nü NCC Group HQs, Kohima nung tenüingsang agütsüba sentong ka ayongzükua liasü.

Pai SSB NCC Special Entry nung All India Rank 66 nguteta alizüng tajung ka tongtet aser September 25, 2025 nü nungi Officers Training Academy (OTA), Chennai nung oa training agitsü, koba pai officer ka ama Indian Army nung shilem agitsü mapang talangka nungi mangdang yua aliba asangsang

akumer.

Under Officer Konyak yagi NCC 'C' Certificate Examination (2024) nung 'A' grade angu aser pa dak lenisüba sempet tajung aliba ajiteta March 2023 nung Under Officer jenjangi ajungketa liasü.

24 Nagaland Battalion NCC tenüng nung Under Officer Konyak-i Inder-Group, Inter-Directorate level camps aser tetoktepba balala nung takok tajung ngua liasü.

Mensham Konyak tebu ya Naga Regiment nung Nb Sub S. Nokom Konyak (Retd.) lir, aser tebui ajungmesoa pai temulungtetba tulu nung yimya tajung amshia cadet nung ali. Pa den külem tenzüker temi pa kanga saklok aser seniors temi pa kanga akumtsüboa liasü.

Pa nem tenüingsang agütsüba sentong nung jembidang Konyak-i takok ngutetba ya bendanga agütsüba, meranga inyakba aser mangdang nung ranglokba tatishitsü tajung ka lir, ta Group Commander-i shia liasü.

Assam Rifles-i Piphema nung lecturer sentong ayongzük

Dimapur, Rongjui/Sept. 21 (TYO): Lanurtem yimya balaka nung ajungmesotsü mechi Assam Rifles ajanga Modern College, Piphema nung Operation Sindoor indang 'motivational lecture' sentong ka September 21, 2025 nü ayongzükua liasü, kong kaketshir 112 aden.

Armed forces tem tasü aitba indang school aser college tem ung awareness agütsütsü nükjidong nung iba sentong ya ayongzükua liasü.

Iba sentong nung Operation

Sindoor tasa yangluba, tasü ita mapa kuma inyakba aser iba sülen India indang anüngkak kumzükua ayutsü asoshi sepaitemi mera balala agiba indang rateta ashi.

Iba sentong nung kaketshirtem dak tejangraba balaka ajiteta parnoki asüngdangyaa liasü.

Lanurtem den tesendaktep tashi itshtitsü, linük meimba mulungsentsü aيتدaksütsü, aser armed forces nung adentsü asoshi ajungmesoa iba sentong ayongzük.

Mokokchung nung pensioner dang metetdaksür

Dimapur, Rongjui/Sept. 21 (TYO): State aser National Schemes kübok Old Age Pension, Widow Pension, Disability Pension agir ajunga dang sangdong ka nung, 2024-2025 atema Direct Benefit Transfer (DBT) ajanga iba teyari mangu alirtem pension benefit ya September 25, 2025 nü nungi tenzükua District Welfare Office, Mokokchung nungi office mapang agütsütsü, ta metetdaksüogo.

Item pension agirtemi Personal Contact Number agütsütsü nungdaker aser shirnoki tang tashi bank account details magütsü alir, parnoki pei indang bank account passbook photocopy ka bener arutsüla aser iba sülen bank account malir nem payment kecha magütsütsü, ta sangdong ajanga ashi.

Tsüngtong marutetba beneficiaries melena arur temi pei Arogo indang Pastor nungi beneficiaries indang Life Certificate den pension Payment Book bener arutsüla.

Sür aliba beneficiaries atema temelaba agüja aliba nisungi pension benefit agizüksü atema Yimtsüng/Ward Council Chairman nungi Death Certificate aser Authorization Certificate bener arutsüla, ta sangdong ajanga ashi.

Tsükong/Yimtsüng/Ward telemsa yamai agütsütsü:

I. MOKOKCHUNG TOWN

1. Arkong, Aongza, Alongmen, Alempang, Artang Penli, Majakong, Mongsenbai, Kumlong, Lijabalijen - 25th Sept. 2025
2. Sangtemla, Salangtem, Sungkomen, Yimyu Marepkong, Kichutip, Dilong, Tongdentsuyong - 26th Sept. 2025

II. ONGPANGKONG

1. Ungma, Kupza, Settsu, Aolichen, Alichen Mokokchung Vill & Compound, Longmisa, Chuchuyimpang --29th Sept. 2025
2. Longsa, Meilong, Moalenden, Chubayimkum Longkhum, Mangmetong, Khensa, Mekuli - 3rd Oct. 2025
3. Chungtia, Aliba, Kinunger, Sabangya, Longjongkong - 4th Oct. 2025

III. ASETKONG

1. Mopungchuket, Longpa, Chami, Kubolong, Khanimo Sungratsu, Yimchalu,

Alongchen, Longjang -6th Oct. 2025

IV. LANGPANGKONG

1. Yisemyong, Mongsenyimti Vill & Comp., Pangsang Longkong, Chakpa, Yaongyimti Old & New, Salulamang -7th Oct. 2025
2. Kangtsung, Wameken, Aopenzu, Anaki, Tuli, Luyong, Tzudikong Chuchuyimlang Vill. & Comp, Unger, Akhoya, Asangma -8th Oct. 2025
3. Changtongya/Yimsen & Town.Yaongyimsen Vill & Comp, Merangkong Vill & Town, Kelingmen - 9th Oct. 2025

V. JANGPETKONG

1. Khar, Molungkimong, Yimchenkimong, Alongkima -10th Oct. 2025
2. Changki, Nokon, Longnak, Merakiong, Molungyimsen - 15th Oct. 2025
3. Waromung, Chungliyimsen, Mongchen, Debuia - 16th Oct. 2025

VI. TSURANGKONG

1. Ch u n g t i y i m s e n , Longphayimsen, Watiyim, Medemyim, Aokum, Aosenden - 17th Oct. 2025
2. Aosungkum, Satsuk, Shihaphumi, Akuhaiga, Moayimti, Vikuto - 21st Oct. 2025

VII. JAPUKONG

1. Mangkolemba, Japu, Longjemdang, Alongtaki, Lakhuni - 22nd Oct. 2025
 2. Changdang, Athuphumi, Nokpu, Aonokpu, Yajang A, B, C -23rd Oct. 2025
 3. Lirmen, Akumen, Tsuremmen, Saring, Longchem - 24th Oct. 2025
- Maneni Active Bank Account aliba beneficiaries asoshi Pension sen ya tsünglanglen agüja aliba anogotem nung pei Bank Accounts nung inoktsüogo:
1. CBI Mokokchung - 08 - 09-2025
 2. CBI Kubolong-08-09-2025
 3. HDFC - 09-09-2025
 4. Axis - 09-09-2025
 5. SBI - 09-09-2025
 6. Bank of Baroda, Ungma - 10-09-2025
 7. Bank of Baroda, Mokokchung - 10-09-2025
 8. Indian Bank, Mokokchung - 11-09-2025
 9. Indian Bank, Changki - 11-09-2025
 10. IDBI Bank- 19-09-2025
 11. NStCB Ltd -20-09-2025



September 21, 2025 nü Thiruvananthapuram nung Kerala BJP Tir, Rajeev Chandrasekhar-i party lenir aser councillor, K Anil Kumar tasümang süngden nung naro yutsüdang tangokba noksa nung angur.

GST tasenba ajanga India kanga kera aintsü: PM Modi

New Delhi, Rongjui/September 21 (Agencies): September 22, 2025 nungi GST saru tasenba benoktsü lia Amongnü nikongdang Ato kilonser, Narendra Modi-i, tangar dak memetaloki aliba linük ka akümtsü atema GST tasenba ya tongtimbang mera ka lir, ta metetdaksü.

GST kübok osettsüset aika nung saru ajemba September 4 nü sangdonga liasü, aser GST tasenbaji September 22 nungi mapa küma benoktsü.

Ato kilonser Modi-i demonetisation aser sepaitem operations densema mapang shia linük nung nüburtem nem kanga tongtimbang sangdong agüja arudar.

Amongnü nikongdang 5:00 ako meta linük nüburtem den jembidang Ato kilonseri, "Asüng nungi Navratri benjung tenzüksü. Ni nenok den salem lemsateper. Navratri benjung mezüng anogo nungi linüki tangar dak memetaloki aliba linük ka yangertsü atema tongtimbang mera ka agir. Asüng Navratri mezüng anogo nung anü adokba den külemi Next-Generation GST tasenba benoktsü," ta metetdaksü.

"Item temelenshi ajanga India ainba otsü kanga kera melenshitsü, melamela business inyaktettsü, investment tajungba akümtsü aser linük renlokba nung state ajak kasa partner akümtsü. Asüng nungi linük nung GST savings benjung tenzüksü. GST savings benjung mapang nung nenoki sen teimba rizünga yutettsü aser nenoki sapuba osettem jenjang dalang agi alizüktettsü. Sensakertem, middle class purtem, neo-middle class purtem, lanurtem, aluyimertem, tetsürtem, dokan amenertem, shishilembartem aser asen linük nung entrepreneur temi iba

saving benjung ajanga tajangzük kanga angutsü. Iba benjungmong mongpu nung nisung ajak melungiang nung tepela alitsü," ta pai metetdaksü.

"2017 küm India-i GST benokba ajanga temelenshi lenmang nung jaja tenzüka liasü. Ibaji ajanga putu ka süiadok aser rongsenkettzüng puti otsü nung otsü tasen ka tenzüka liasü. 2014 küm linüki kü nem Ato kilonser khuret benloksüba mapang nung bendanger osangkaket ka nung tatalokba ka sangdongba ni bilemtetter. Iba nungji company kati ajangshiba timtem aika metetdakja liasü. Iba company jagi, onoki Bengaluru nungi kilometer 570 pilar aliba Hyderabad tashi osettsüset yoktsü kanga tasak, anungji osetji mezüng Europe tashi yokba sülen ang kasa osetji Europe nungi Hyderabad-i yok tajungba ta telemtetba agi ta ashi. Iba mapang nungji saru kanga tebenja asüba agi iba ama tensaji ajurua liasü. Iba mapang nungji item ama company million aika den linük nung nübur million aikati anogo shia timtem ajurua liasü, aser ibaji saru tebenja asüba agi liasü. Yimti ka nungi ka tashi oset shibelenba nung sen tali indokba ajanga sensakertem aser na ama customer tem takoksa angu. Iba ama tensa ka nungjagi linük nung nüburtem kümzüksü kanga nüngdaka liasü," ta pai metetdaksü.

"Tesüiba küm 11 tsüngda linük nung nütsüng crore 250-i sensak tia tamakok ngudaktsüogo. Sensak tia nungi adokba 'neo-middle class' ta ajaba nisung crore 25 jagi tanübo linük nung tongtimbang shilem agir. Item neo-middle class purtem pei taginüba aser tejangraba liasü. Taküm sorkari sempet ka agüja küm shia sen lakh 12 tashi angurtem dang nungi saru magir.

Sen lakh 12 tashi angurtem dang saru magiba ajanga middle class purtem taküm libaliru kanga melenshiogo.

Tangbo sensakertem, neo-middle class aser middle class purtemi anasü tajangzük angur. Tang ano GST saru ajemba ajanga linük nung sensotemi pei nükjidong melamela atongtsü," ta pai metetdaksü.

"Temelenshi ya maneni melenshia dang aliba inyakyim ka lir. Tensa mapang melenshiba den külemi linük nüngdak melenshir; yamaji next-generation temelenshijia kasa nüngdaker. Tang linük nüngdak aser tarutsü nükla temelung nung yur GST inyakyim melenshia benoker," ta Ato kilonseri metetdaksü.

"Linük nung nüburtemi kechisa nüngdakdir asenoki ibaji linük nung yanglutsüla. Terenlok India ka akümtsü atema asenoki peisasa pei dak metaloktsüla. Iba atemaji MSMEs khuret tulu ka lir. GST ajemba ajanga small-scale industries kanga tajangzük angutsü. Anogo shia asen taküm nung bendanglen yangluba osettsüset aika amshir. Asenoki iba nungjagi pilatsüla, aser India nung yanglutetba osettem dang alizüksüla," ta pai ashi.

"Asen linük nung aliba small-scale industries ya alima nung tajungtiba kümdaktsütsüla aser asenoki yanglutetba osettemji global standards nung asütsüla," ta pai ashi.

"Nagrik Devo Bhava' tangatetba sülen anidakba ajanga asenok tejakleni odar, aser ibaji asenoki Next generation GST tasenba nung angur. Asenoki income tax ajemba aser GST ajembaji ka kümdaktsüra küm ka nung linük nung nüburtemi sen 2.5 lakh crore kümzüksü. Ibayongji ni, iba ya savings benjung ka ta jembir," ta Ato kilonser Modi-isa metetdaksü.



September 21, 2025 nü Uttarakhand kübok Chamoli district nung a n e n t s ü h l e n d o n g atalokba sülen NDRF aser SDRF sepaitemi tasümang bushidang tangokba noksa nung angur.

Mahagathbandhan teloktep nung mangatettep mali: Tejashwi Yadav

Patna, September 21 (Agencies): Bihar nung Opposition lenir aser Rashtriya Janata Dal (RJD) lenir, Tejashwi Yadav-i, Mahagathbandhan teloktep nung dena aliba party tem tsüngda mangatettep mali aser menden lemsaba maparen tatembangleni arudar, ta metetdaksü.

Vaishali nung Bihar Adhikar Yatra nung shilem agiba mapang nung Yadav-i Election Commission aser BJP aija, taoba election nung ochimashi tulu liasü, anungji taruba election nungbo onoki ochimashi nokdangtsü, ta metetdaksü.

Party tem tsüngda menden lemsaba dak sendakba nung pai, "Kobi melii maparen renemtsü. Onok tsüngda mangatettep kecha mali. Maparen ajak tembangba sülen kobi melii sangdong agütsütsü," ta metetdaksü.

"Taoba election nung vote auyaba dang masü saka onok meyong menden-a kar auyaa liasü, ta ajaki meteta dang lir. Yamaji taoba sorkar aküm saka taruba election nungbo onoki ochimashi memelatsü aser tangbo onoki sorkar akümtsü," ta pai metetdaksü.

Taoba mapang Bihar Deputy Chief Minister Yadav-isa, Election Commission-i BJP pusema inyaker, aser iba

atemaji kuli aika lir, ta metetdaksü. "Kuli peria lir. Election Commission-i BJP yaribaji nüburtemi tenük agi nguogo. Chandigarh nung CCTV noksa pua ayu aser iba mapang nungjagi Election Commission-i CCTV shibangtsü. Election Commission-i BJP indang cell ama inyakbaji ajaki meteta lir," ta pai ashi.

RJD lenirisa, "Politics tasen ka atema ni yagi aru. Yangi kin mesüra yimsü indang mejembitsü saka terenlok, azükaru aser sector ajak nung industries atema jembitsü. Bihar nung per capita income aser per capita investment teimba akümtsü atema jembidar," ta metetdaksü.

Tawa Khagaria district nung jembidang Yadav-i, tang Bihar nung yimtenren tongbang ya lanurtem aser aluyimertem tarutsü tia atema lir, ta ashi.

"Iba rara ya aluyimertem asentzü, aayangertem meranga inyakba aser mapa mengui aliba lanurtem tarutsü tia atema lir. Kü leniba nung Bihar takokleni mani tashi ni animesüngzüksü," ta pai metetdakja liasü.

Mahagathbandhan teloktep nung Congress aser RJD na den party tila kar densema lir aser NDA teloktep nung BJP aser Janata Dal (United) na den party kar densema lir.

Kasa maongka agütsütsü atema caste survey nüngdak: K'taka CM

Bengaluru, September 21 (Agencies): Karnataka nung agitsü aliba survey ya caste survey dang masü saka rongsenkettzüng, loktiliba aser shisaliok survey ka lir, ta Karnataka Chief Minister Siddaramaiah-i metetdaksü.

Caste survey kübok nisung ka indang caste osang bendenba dang masü saka parnok rongsenkettzüng, loktiliba aser shisaliok dak sendakba osangtem bendentsü; iba ya ajak nem kasa maongka agütsütsü atema lir, ta pai metetdaksü.

Gadag nung aliba Circuit House nung osangbenertem den jembidang pa dang Khristan yimsü amangertem caste aika aliba indang asüngdanga liasü.

Tasüngdangba ka langzüdang pai, survey nung Khristan caste aika züngoka aliba dak sendakba nung aika dang tangatetba asüngdangdar aser caste telemsa kar agientsü atema Backward Classes Commission-i telemtetba agitsü, ta metetdaksü.

Paisa, caste survey atema iba Commission nem tashi agüja

lir, sorkariba iba survey atema telatetba kar dang agütsü, ta metetdaksü.

"Iba survvey agitsü atema tesayur lakh 1.75 nem mapa lemzüksüogo. Tesayur shiai kibong 150 sema osang bendentsü aser anogo 15 tsüngda iba survey agitsü. Tamangba yimsü, caste, sub-caste, shisaliok, mapa aser tanga osangtem-a bendentsü," ta pai metetdaksü.

Swamiji Vachanananda-i iba survey nung melung malemtsüsa asalentong lir, ta jembiba o dak sendakba nung Siddaramaiah-i, "Centre sorkaria caste survey ka agidar. Süra iba nungjia asalentong kar ali asü? Minister kati danga iba survey mashishir. Loktiliba nung ajak kasa züngshitsü aser tongtimbangsüa sensakertem nem sorkar schemes agütsütsü atema iba survey agir," ta metetdaksü.

BJP-i state Angh dang iba survey nokdangtsü mepishiba dak sendakba nung Siddaramaiah-i, "Survey onük nung BJP-i politics asayar. Iba nung ya caste melemsatsü," ta ashi.



TIR YIMYIM YIMOBILEM (EDITRIAL)

DIMAPUR MONDAY, SEPTEMBER (RONGJUI) 22, 2025

Lendong menaba o

Assam Kaziranga University nung yakanü Naga nung kaketshir kati Assam nung nungtugu kenter Zubeen Garg sapurtem mulung yirutsüsa o mashi jembiba agi, iba Univeristy nung azünger Naga nungertem dang masü saka tereprangtsü nung Naga nungertem mesükba kidanger state-tem nungi tangar kaketshirtem dena timtemi aitsüsa atalokba lendongji kanga tesasatsü aser tan asütsüba mapa ka lir. Asenoki aiben tangar koba tia nung aliar memetet aser mebilemdangi aseni bilembaji dang shitak amai jembir aser iba jagi aiben aseni meteta aser memeteti tangar mulung yirutsür. Aji oda, asenok karibo mangyimba kidanga salepsari o mashimashi jembia wawamenütsü ayonger. Ibaji kenyongi anogo aser mapangi memelaba mapa ka lir. Iba amaji asenoki mangyimertem den mangyimtsüba ser nung nisung asüba agiang asenok pelar ama parnok tsüngdang pelatepra, ibaji nisungi nisung mezügmeshiba mapa asütsü. Asenok asoshi paji kecha masütsüa akok aser asenok aikati paji temeteta memetetsüa akok saka Zubeen Garh ya Assam nung dang masü saka alima nung nungtugu kentener ka liasü. Iba jagiang pa Singapore tashi kenten benjong sentong ka nung shilem agitsü asoshi aoba liasü. Ajisüaka, tia mejungi pa yangji lendong ajurua asü. Tanü Assam nung nungtugu kentener Zubeen Garh asüba tejashi sayua Assam government-i dena anogo asem Assam ajaklen mangyima amongtsü sangdonga lir aser Guwahati nungbo nübortem dokan kata melapok mangyima amonger. Ano, pa mang agizüktsü asoshi nisung ajir-majijem Guwhati yimti yimdong sema aotsüsa atalokbaji amata nisung asüba masü ta kuli sayur. Ajisüaka, asenokibo ajia memetet aser mangatet ser iba nisungji mezügmeshia jembitsübaji alima tsüngdang asenokji kodaka mashimalu asütsü. Aji oda, asen mashimalu aser kecha memetet ser tangar tsüngdangbo tuluka ama bilema o tulu jembiba agi tanü ama asen dang masü saka tangar dena lendongi idaktsür. Tanü putu nung balaka alima tesem ka nung nisung kati kar anema o tera mekümdangi jembir nung jet ta noksa dena tangoker prokshir aser iba jagi nisungtem rongnung rongrong aser petsapetrong, tang amaji, tulu adokdaktsür. Iba denji ano tanü putu nung Gen Z ta ajaba lanurtem ya melamelaa jashir aser tejashi nung melamelaa mapa kuma inyaker alir. Aji oda, tanü putu lanurtem yagi o talanglang jembiba nung mamanger saka o agi jet ta mapa kuma inyaker. Iba jagi tajung nunga yaktayongi telemtetba tajung agia mapa kuma inyaker alir aser tamajung nunga yamaji jet ta mapa kuma raksar alir. Iba nungji tsüraburtema aser lanurtema tekümdangtsü tulu lir. Talisa Naga nungertem chirnurtem aika Kaziranga university nung azüngertem amaji bendanglen kaketreju balala nung tangar tamangba yimsü aser sobaliba balala amanger aser beshirtem den külemi azünger, anungji tangar tamangba yimsü indanga metettsüla aser tangar sobaliba aser jembishinü indanga meteta akümtsübutsbaji kanga tongtibang akümer. Ibaji kidang nungi mapusodangyongi tsüraburi tanurtem dang ashitsüla aser kaketreju nunga tanurtem nem item tangatetbaji tesayurtemi agütsütsü kanga tenügdaktsü kümogo. Ano, asenok balaka achiajem nunga kanga mekümdang aser tesadok, asenoki machitsüla aikabo maka, anungji tangari machiba chiyongtsü asenokibo achir. Aji oda, asenok Muslim nungertem den alir ser nung asenoki kecha hau ta mali ak shi chia sayura mesüra Hindu nungertem den alir ser nung nashi shi chia sayura, chiyongtsü kija agi asenok taküma aotsü aser tang amaji, tangar nema lendong tulu bener arutsütsü. Alima nung tatalokba mapa tajung-majung ajak o nungi tenzüker, anungji mapa ajung majungtsübaji asenoki jembiba o dak keta lir. Aji oda, kidang kibong nunga aser lokti nunga o agi rara tenzüker aser o agi jashia aliba mulungjanga süneptsür. Ibaji meteta kodang asenoki asen alidak o tajung aser tanep jembidir, memetetika asen dak tangari saloker alitsü. Aji oda, tanüba alima ya kibong ka ama dang, anungji kidang alirtem rongnung o aser mapa ajak nung kati ka akümtsübitepa alitsübaji kanga tongtibang aser tenügdaktsü asütsü.

OLEMSABANG

LAI BUSHIBA: ALIMA NUNG TASHI TULUTIBAJI TAMANG (IBRI 11: 1-40)

~ Rev. Maong Lemtur

(Iba ya DABA Tongtepratep Adok 156, January - July 2024 nung adokba ocet tazüngertem ajangzükdaktsütsü bilema adoktsür).

Ibri shiti nung tatembang buba shilemji tapu 11- 13 tashi ya lir. Item tapu nung zülua aliba otem ajanga tamanger ajak "tamang" agi taküm alitsü ayongzüker. Tapu 11 nung "Tamang" indang rateta zülua lir. Anungji Ibri tapu 11 ya tongtibang shilem ana kuma lemdanger angatetsü merangdi: 1. Tamang teratet (Ibri 11: 1-3)

"Tang teimla ayubatemji chichia kar ta, aser manguba osettemji atangji lir ta metetbaji tamang lir. Kechiaser tamang akaba agi alemli nisungtemi Tsüngremi junger ta agizüktetbaji angu. Mangubatem nungi tanguba osettemji yanglua lir ta metettsüsa Tsüngrem O agi alima ajongaji yanglu ta tamang agi asenoki angateter" (Ibri 11: 1-3).

Tamang ta asubaji manguba osettemji atangji lir ta metetba aser agizükbaaji lir. Aser tarutsü alibaji ataloktsübasu ta agizükbaaji tamang lir ta Lai jagi ashir. Shitakba tamang lir ta sayubaji mapa ajanga kuli agütsür. Anungji mapa jagi tamang lir ta kuli sayur. Asenoki Tsüngrem lir ta amangra, Pai ashibaji tashi angatsüla. Iba tapu nung tamangertem shirnok indang taküm kuli zülua lir, parnok tamangji mapa ajanga kuli sayuba tamang liasü. Mapa madenbaji tamang tasü, mesüra ochi tamang masü ta Yakobi ashir (Yakob 2: 14, 17, 20-24).

Tsüngremi kechisarena yangluba mapang nung asen tenük agi manguba osettem nungi tanguba osettemji yanglu ta tamang agi asenoki meteter (t. 3). Kodang asenoki alima nung aliba osettem aser anüng nung aliba osettem dak rangloker, item indang ajakbo asenoki junga mangateter. Saka tenük agi anguba aser manguba osetem ajak tenük agi manguba Tsüngrem ka ajanga yanglu ta asenoki amanger. Anungji Tsüngremi kechi inyaker aji tamang ajanga angatetdaktsür. Tangari mangubajia tamang jagi

ngudaktsür, aser tangari meinyaktetba inyaktetdaktsüsa tamang jagi yarir.

II. Tamang indang kulitem (Ibri 11: 4-10)

1. Abeli tamang agi Tsüngrem külem.

"Tamang agi Abeli Tsüngrem dang Kain dang nungi tali tajungtiba tenla ka, koba agi pa temeshi liasü ta kuli angu, aji tenla aser Tsüngremi pa sempet indang kuli agütsü, aser aji agi pa süaka ano pai maneni jembir" (Ibri 11: 4).

Abel aser Kain otsü ya Lipok 4: 1- 10 nung shia angur. Abelji Tsüngrem matsüngdang temeshi nisung ta pa tamang ajanga kuli agütsü. Tamang agi Abeli Tsüngrem tashi anga. Kaini pa tamang mapa agi mesayutet, anungji Tsüngremi pa tenla magizük. Tamang ajanga tenlaba aser külemba dang Tsüngremi aginür. Alima nung alir rongnung tamang agi Tsüngrem külemba mezügbuba tatishitsüji Abel liasü. Yamaji Tsüngrem külemertem ajaki ochi aser tamang agi Tsüngrem külemtsü nungdaker. Naia ochi tamang agi Tsüngrem külemer asüng masü?

2. Enoki tamang agi Tsüngrem den jaja.

"Tamang agi Enok nem tasüba mungudaktsütsü asoshi pa meyipa agein aser pa mungui adok, kechiyong Tsüngremi pa meyipa agien. Kechiaser pa meyipa magiendang yongi pai Tsüngrem temulung chidaktsüba kuli angu. Aser tamang medeni Tsüngrem mulung chidaktsütsü makok, kechiyong shibai Tsüngrem dangi arudir, pai Tsüngrem lir ta, aser pa bushirtem nem tajangzük agütsüba lir ta amangtsüla" (Ibri 11: 5- 6).

Asen tamangji anogo shia Tsüngrem den telungjem kaa jajaba ajanga ainer. Tsüngrem O azüngba aser sarasademba ajanga asenoki Tsüngrem den tamang agi jajabaji kuli agütsür. Tzümet süng agi alima meshitokdang, Iba temenen lima nung Enoki Tsüngrem den jaja. Enok nem tasüba mungudaktsütsü asoshi pa meyipa agein aser pa mungui adok, kechiyong Tsüngremi pa anir oadok. Tamang agi Tsüngrem den lungjemba aser jajaba tatishitsü takümüji Enok liasü. Yamaji iba temenen lima nung tamanger shiai tamang agi Tsüngrem den anogo shia jajadaktsünür. Naia anogo shia tamang agi Tsüngrem den jajadagi ma?

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Evangelical Fellowship of India kübok commission aika tenzükogo

Nagpur, Rongjui/September 21 (Agencies): September 18, 2025 nü Nagpur nung ayongzükba All India Congress on Church in Mission (AICOCIM) senden tatembangbuba anogo nung Evangelical Fellowship of India (EFI) kübok Commission aika tenzükogo.

Anogo pezünü tashi senden nung India tesem balala nungi Khristan lenirtem aser Arogo nung lenir 450 dak tali aden; parnoki sarasadem sentongtem agi, onük balala nung o lemteper aser onük 13 atema asalentong renema report agütsü.

Tatembangbuba anogo nung anepdang lenirtemi onük 13 indang reports agütsü aser item onüktem rongnung nütsüngsüba, ochi temeden, digital ajanga mission mapa inyakba, kibongtem aser theological shisaliok densema lir.

Nagpur nung ayongzükba agiba senden nung lemtetba mapatong tasen balala ajanga taruba küm 10 atema India nung aliba Arogotem latettsü.

Tatembangbuba sentong nung Evangelical Fellowship of India (EFI) General Secretary, Vijayesh Lal-i, iba Congress chichiba tetezüji senden amenba mesüra bangzüng renemba masütsü saka koma inyaka tejakleni aotsü, ibaji asütsü, ta metetdaksü.

Lal-isa, "Iba Congress ya tatembang masü. Iba ya kishizüng ka lir. Asenok adenshibaji masü saka yang nungi pilaa aodang tajaba koma



inyaktsü, ibaji asütsü," ta ashi.

Paisa, iba senden ya India nung Arogotem atema maongka liasü; bendanga agütsütsü tasü aittsü aser imdangjema inyaktsü atema mapang tongogo, ta ashi.

Paisa, "Iba Congress ya menungratsü sentong ka tesüdaksü saka movement ka kümdakjang," ta ayongzük.

Tatembangbuba sentong nung Lal-i 'Nagpur Declaration' sangdong. Iba sangdongji shilem agirtem nem lema agütsüogo. Taruba ita ka tsüngda iba sangdong 'draft' ji jungjunga asadangba sülen tatembangbuba sangdong renemtsü.

Tatembangbuba sentong nungsa Evangelical Fellowship of India kübok commission aika tenzükogo, aser item commission rongnung Commission on

Discipleship, Commission on Justice, Dalits & Tribals, Digital & AI Commission, pastor tem atema Shepherding Commission aser Families & Singles Commission lir.

"EFI küm 75 ajungba nüngtem nung tanü item commissions tenzüker. Item commissions ajanga Arogo mission tashi itdaksütsü," ta Lal-i metetdaksü.

Taruba anogotem nung tongtibang onüktem nung rangloker inyaktsü atema specialized task forces tentettsü; item onüktem rongnung evangelism, theological shisaliok, media & artificial intelligence, mental health, research, leadership development aser tetsür o lanurtem nem tashi agütsütsü densema lir.

ANOGO ABEN TSÜNGREM DEN

Tasüngdangba Takang

- T.Ken 119: 89 - 96.

Alima nung terenemba takang mayur ta nai meteter asü? Yimtenren terenemba aika renemer saka teinyaktetba tera dang alir. Terenemba inyaktsü agütsür saka tebenja teimba adoker. Ano renemshitsü jembir. Kodanga takang terenemba malir. Mapaji yamaji aor süra tekong 89ji reprangang: O Kibuba, teti tatem maka, Nü o kotak nung akanga noktaka lir."

Shinga o akanga malir. Kü tebilemba aser amangba ni melenshir.Kodang ni kü o shidak yudir aji tamangtsü lir. Saka Tsüngrem O bo teti akanga akanga lir. Pa O atangji aser tamangtsü lir. Tsüngremi tiyazü jembitsü makok, anungji Pai Pa O nung melenshitsü ta asenoki shisabulua malitsüla.

Tsüngremji teti tatem makai atangji lir.Bazar nung, dokan nung teti oset jenjang melenshir. Tsüngrem O bazaar oset amaji masü. Yisui ashi, "Anüng ali suitemtsü, saka kü o tem kecha südanga süitema maotsü" (Matt. 24: 35).

Tsüngrem o memelenshir. Tsüngremi o langtepa mejembir. Pai tongmelang agi ashir, " Lemangji ibai lir aser aji yamaji dang alitsü."Pai mapatemji koda bentetter nai metetnera, Pa O ji züngang.

Mapatem koda bentettsü Laishiba nung angur. Rara koda bentettsü Tsüngrem O nung ashir, tebilemstsütem koda bentettsü aser temenen nungi koda kümdang alitsü, Tsüngremi ashir. Ajak rong nung tajungtibaji, kotaki koda aotsü Pai Pa O nung ashir.Iba nung ajak bentetter. Yisu Khrista asenok asoshi kangki nung asü, asenok kümzüksü tanaben shia aru aser tamang ajanga Pa dangi arur ajak Pai kümzüker.

Mesüngjemtetba taküm nung Tsüngrem O ji tashi aser tesangwa ama alir.Ibai atangji, teti tatem maka aser melenshitsü makok nung asenoki ibai amangtsü akok aser iba ochi O nung alitsü akok. Tsüngremi temenen, tasüba, tekümtet aser teti tatem maka taküm indang tasüngdangba ajak Pa O ajanga bentettsüogo. Nai iba tasüngdangba ne sasa bentettsü akok asü? Tsüngrem O ji züngang aser bushiang.

China nung maneni yimsü dak sendakba tenokdangba benoker

September 21, 2025: Hombarnü (September 15) China nung ketdangsertemi online ajanga yimsü dak sendakba osangtsüsang/videos/noksa lemsatepba nokdangba metetdaksüba den külemi sorkari memelaba online platforms mamshitsü aser online nung lanur telok balala medentettsü metetdaksüogo.

China nung National Religious Affairs Administration-i tamalen-a tenokdangba balala benoka liasü, aser iba ya online nung yimsü dak sendakba osangtsüsang lemsaba aser tamangba yimsü temeden anema lir, ta Bitter Winter-i metetdaksü.

Bitter Winter-i, "China-i yimsü dak sendakba anema tenokdangba benokba ya tang mezüng masü. Digital ajanga ministry mapa inyakba putu mapang ka nung item tenokdangba benokba ya sorkari metetsümonga online nung yimsü dak sendakba

osangtem nokdangba lir," ta metetdaksü.

Bitter Winter-i ashiba agi, Arrla 5 kübok Arogo nung lenirtemi registered religious organizations indang websites, applications, forums aser platforms ajanga dang yimsü dak sendakba shisaliok aser online training agütsütsü akok.

Arrla 10 kübok Arogo lenirtemi tanurtem den yimsü indang lemsatepba nokdangba aser yimsü dak sendakba shisaliok, training aser camps nung shilem agitsü tanurtem nem temelaba magütsür.

"Arogo nung lenirtemi online ajanga tanurtem den o s a n g t a j u n g melemsateptettsü mesüra lanurtem atema camps mesüra training ayongzüka magitettsü. Fundraising memelar, yimsü dak sendakba osettsüset/süoshi ayokba memelar. AI evangelism jibo otsü nung mali. Yimsü dak sendakba osangtsüsang lemsateptsü atema AI

amshitsü memelar," ta Bitter Winter-i metetdaksü.

Item tenokdangba ya China nungertem atema dang masü saka bendangertem atema-a lir. Item tenokdangba ya China nung dang masü saka Hong Kong, Macau aser Taiwan nunga benoktsü.

Arrla 8 kübok Arogo nung lenirtemi internet dak sendakba nung bendangertem den longjemer inyaktsü memelar mesüra bendangertemi ayongzükba yimsü dak sendakba sentongtem nung shilem agitsü memelar.

"Arrla 13 kübok Arogo lenirtemi live broadcasts asütsü memelar, video tatsü sayutsü aser online ajanga senden amentsü memelar. Iba dak alia WeChat groups aser WeChat Moments nokdangba," ta Bitter Winter-i metetdaksü.

Alima nung Khristantem alitsü atema linük tamajungtiba 50 rongnung China ya jenjang 15buba nung lir (Open Doors' 2025 World Watch List).

Church of England-i Khristan mission atemapound sen million 11 agütsü

September 21, 2025: Church na nem senteper sen million 1.5 lezmzüksüogo; Arogo ana yagi kijung-lanu kibongtem atema inyaker.

Church of England-i ashiba agi, tesüiba küm ka tsüngda shi tajangzük angutsü, ta osang ka ajanga metetdaksü.

CofE indang Strategic Mission & Ministry Investment Board (SMMIB) nungi lezmzüksüba senotsü ajanga Khrista osang tajung prokba organizations, nütsüngsüba mapa aser Arogotem outreach yaritsü.

Sen million 11 jagi Church of England nung parishes shilem 45 shi ayimjemtsü; item parish kübok Arogo 5,500 shi lir.

Partnerships kübok ministry lenla pongu nung rangloker inyaktsü, item ministry rongnung tanurtem aser lanurtem, digital ajanga osangtajung prokba aser Arogo tasen atema Tenla kitem sütsütsü densema lir.

Messy Church aser Bubble

Church na nem senteper sen million 1.5 lezmzüksüogo; Arogo ana yagi kijung-lanu kibongtem atema inyaker.

Church of England-i ashiba agi, tesüiba küm ka tsüngda Messy Church nung Arogo nütsüng anasü agi teimba kümogo aser kibong aikati baptia züngsem kümogo.

Anfield nung aliba St Columba nunga putir Daniel Howard-i nisung aikati Khrista agizükogo aser tangbo parnoki Arogo nung tongti shilem agir, ta metetdaksü.

Strategic Board nungi Alison Coulter-i, item project ajanga 2030 küm tashi nungbo Arogo nung lanur nütsüng anasü agi tali kümdaksütsü, ta metetdaksü.

"Item sentong balala ajanga lanur aika den Khrista osangtajung lemsatepa nütsüng kümdaksütsü. Tsüngremi item programmes ajanga koma mapa inyakdir ibaji repranga atatsü onoki yongyaa atar," ta Coulter-isa metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Tezü

(n) shiruru kolak nung ajuajua adokba (horn)

* Nisung aikati shitsü tezü aginür.

Tezü

(n) alu aser arem nung süngzü ama aienba dong (vine, creeper)

* Mapu aser züangi ya tezü nung atangba aonsutsütem lir.

OLONG PAITEP # 7278

	1		2			3		4		5
6								7		
					8		9			
			10							
11										
				12						
13		14		15						16
17										18

TIPIEN

- Inyaker ajangtetba
- Bangsemo adokdak
- Shitak mesüi inyak
- Ya mimong nung angur
- Reprangzük
- Tasola
- S _____
- Yagi ajak ashioktsür
- Ki aokba oset
- Ak shi nung inokba tasen
- Ishika

- (3)

- (5)

- (7)

- (3)

- (4)

- (5)

- (4)

- (3)

- (7)

- (5)

- (3)

LANGTSÜNGLEN

- Meshidak
- Tanaben soshir
- Iba anogo
- Meshi
- Yagi mi tsükloker
- Shi tapu ka
- Yagi ayimer saka ozü masü
- Ajokba shiruru ka
- Inyaktet
- ____ hi
- Akümlü nungi pilar

- (3)

- (7)

- (4)

- (3)

- (9)

- (9)

- (3)

- (7)

- (4)

- (3)

- (3)

OLONG PAITEP # 7277 TELANGZÜBA**TIPIEN :**

- Telok, 4. Aluru, 6. Ozüing, 8. Emk,
- Kin, 10. Teti, 12. Süir, 13. Jen,
- Ola, 16. Talak, 17. Mazük.

LANGTSÜNGLEN :

- Tenükjang, 2. Luden, 3. Kioktsü,
- Lenti, 7. Tajangzük,
- teronem, 12. Sempa,
- Jahaz.

NAI-A YA METETTER

Washington, D.C., United States nung aliba U.S. Library of Congress ya aliba nung kaketnang tulutiba lir. Iba kaketnang nung e-books nung alemli scrolls dena 175 million works bendena lir. Iba kaketnang nung oshi 470 indang print materials aser 61 million manuscripts tema lir.

Library of Congress ya United States indang national library lir aser public asoshi research & historical access bushidak lir.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Zubeen Garg mang tanü tashi Sarusajai nung ayutsü: CM Sarma

Guwahati, September 21, 2025 (Agencies): Nüingtugu kentener Zubeen Garg nem tetushi agütsüdaoktsü atema Sarusajai nung aliba Bhogeswar Baruah Stadium lapoktsür ta Assam Chief Minister Himanta Biswa

Sarma-i Deobarnü ashi.

"Nisungtemi asenoki meima aliba Zubeen tatembang süa reprangnür aser onoki item tebilemba angateter. Anungji Bhogeswar Baruah Stadium taonung piyong lapoktsü. Asünga

Zubeen mang Sarusajai nung dang ayutsü" ta Chief Minister Sarma-i ashi.

Tanü nikongdang Zubeen Garg indang mang stadium-i bener aru aser nisung meyrjang aika adenshia pa nem tetushi agütsü.

Tripura Civil Society-i Oct 13 nü state ajunga mokdangtsü

Agartala, September 21, 2025 (Agencies): Tripura Civil Society-i October 13 anogo piyong state ajunga mokdangtsü ayongzükogo.

Ozüing alema arurtem anema Inner Line Permit (ILP) system tenzüksü aser tekaratiba nung Tiprasa Accord mapa inyaksü takhangba agüja parnoki iba mokdang ayongzükö.

"Iba mokdang ya non-political organization kati ayongzükö aser ozü party-ia pusema nungiter" ta Tipra Motha Party MLA Ranjit Debbarma-i ashi.

"Union Home Ministry-i tetuyuba agütsüba ama Tripura sorkari ozüing alema arurtem anema mapa

inyaktsüla. Assam, Gujarat, Delhi, aser tanga state tem ama masü Tripura-i mapa meinyakteter" ta Debbarma-i ashi.

Centre sorkari refugee tem nem India senso agütsütsü anogo atsülangba aitsür aser iba ya Tripura nung civil society-i magizükö ta paisa ashi.

"Tripura nung aser talisa TTAADC areas nung Citizenship Amendment Act ya mebenoktsüla. Refugee aser ozüing alema arurtem kasa masü aser yangi ozüing alema arurtemi senso memeshir" ta Debbarma-isa metetdaksü.

Onoki district ajak nung detention camps lapoktsü, ozüing alema arurtem jangjatsü

asir meypa yoktsü atema Special Task Force tentetstü aser Tripura nung ILP mapa tenzüksü akhangar ta paisa shisem.

Item maparen ya tanga northeastern state tem nungbo inyakdar aser iba ya kin shinga anema masü ta Debbarma-isa metetdaksü.

Sorkari taila SC aser ST certificates amshirtem merenshütsüla aser Kokborok language atema Roman script agizüktsüla ta paisa takhangba agütsü.

October 13, 2025 anepdang nungi nikongdang tashi state ajunga mokdangtsü aser iba ya public tebilemba sayua timi dang amungtsü ta Tripura Civil Society-i metetdaksü.

Mizoram BJP-i Namo Yuva Run ayonga agi

Aizawl, September 21, 2025 (Agencies): Mizoram Pradesh BJP-i Bawngkawn traffic point nungi Namo Yuva Run tenzükö agiogo. Iba sentong ya Palak MLA K. Hrahmo-i tenzükö liasü.

Iba sentong ya linük ajungalen Deobarnü agitsü sentong liasü saka temeshi anogo asüba agi Mizoram nung anogo ka jelia yashi Honibarnü

ayongzükö agi.

Iba sentong nung lanur aser tanur aikati shilem agiba atema pelar ta BJP State President & MLA Dr K. Beichhua-i ashi.

Prime Minister Narendra Modi'er Make in India campaign nung aliba onüktem den külemi temang anepma aliba aser self-discipline ya kanga tongtipang lir aser item ajanga maongkatem angutsü ta

Dr. Beichhua-i ashi.

Namo Yuva Run nung Lalhmunmawia-i mezüngbuba jenjang (Rs. 10,000), T.C. Lalnunsanga-i tanabuba jenjang (Rs 7000) aser Lalkaisanga-i tasembuba jenjang (Rs 5000) takok agizük.

Maneni, Top Ten-i ayir nisung tenet nem senpet agütsü aser tanüingba tasemer shia nem Rs 1,000 agütsü.



Brussels, Sept. 21: Belgium yimtiba Brussels nung September 21, 2025 nü Car Free Sunday alidang nüburtem bicycle nung senzüba noksa nung angur. Iba anogo Belgium yimtiba nung yimtung timba nung anepdang 9:30 ako nungi nikongdang 7:00 ako tashi public transport, taxi, emergency services, police aser temelaba balaka agir alirtem dak alaka motor aliba gari ajunga nokdanga ayu.

Nepal nung Gen Z teloki KP Sharma Oli aputsü akhanger

Kathmandu, Rongjui/Sept. 21 (Agencies): Nepal nung "Gen Z" ta ajaba teloki tang atsüngdoker aliba ato kilonser KP Sharma Oli aser taoba home minister Ramesh Lekhak nung tangsa aputsü akhanger aser September 8 nü sorkar anema longkak aitba mapang police temi nisung 19 tepsetba atema tai tongloksür.

Iba telok yagi anir lanurtemi longkak aita liasü aser taoba ketdangsür temi yimjung nung tenzükba sentong ajemreptsü asoshi sorkar tashi tim masüba nung amshi ta aiya parnok aputsü takhangba ya Honibarnü agüja liasü.

Gen Z teloki osangbener den jembidang advisor Dr Nicholas Bhusal-i ashiba agi, Oli, Lekhak aser Kathmandu Chief District Officer Chhabi Rijal nunger

tangsa aputsüla. Naya Baneshwor nung nisung dak akhaba ya parnok mapa lir ta iba telok yagi tai tongloksü.

Sorkari social media nokdangba ajanga iba longkak aitba ya tenzüka kanga kera ochimashi mapa, sorkar mapa nung ketdangsür temi tenük yoka kinunger shimba aser junga ketdang masüba anema linük tesem ajunga nung movement ka kumadok. Lanurtem ya timba kaketshirtem school uniform nung yimti-yimdongi adoka yimten yimsüsür anema nokdak.

September 8 nü azüdokshi mapang police temi tear gas, water cannons aser tesüsa injang khalokja nisung takum sama aser mapang tatsüka lir Lekhak ya "moral ground" nung mapa nungi anen. Mepetmesü

tali akumba mechi ato kilonser Oli ya September 9 nü mapa nungi anen aser iba mapang longkak aiter temi par jurila ki aser danga sorkar ki nung mi senloksü.

Pa ato kilonser menden nungi atsüngdoker yimjak nung mezüng sangdong agütsüba mapang, longkak aiter dak akhatsü totuyuba kecha magütsü, ta Oli-i ashi.

Injang ya "automatic guns" nungi lir, koba police ket nung mali, ta pai ashi aser iba tatalokba bushisüngdangtsü ayongzüka liasü. Ajisüaka "Gen Z" telok ya ajang-ajanga nokdaka lir aser 1990 nungi linük ketdangsüa arurtem rongsen bushisüngdangtsü akhangerm anungji temelenshi asoshi parnoki tali akhangba sayur.

Israel-i Gaza City amakdang nisung 14 asü

Cairo, Rongjui/Sept. 21 (Agencies): Palestine nunger aika pei meyong osettsüset bener Gaza City nungi Honibarnü jena ogo, aser Israel-i asendenshir amaker, kong Honibar aonung nisung 14 tepset ta heath ketdangsür temi ashi.

Mapang tatsüka lir Israel nung tang tashi Hamas-i pua aliba kinungertem den nisung meyirijang aika adenshia Ato Kilonser Benjamin Netanyahu dang rara tembangtsü asoshi jembishinüang ta akhang.

Jerusalem aser Tel Aviv nung longkak aitba liasü, kong banner tanak tuluka nung US Tir Donald Trump dang iba rara tembangtsü teyari meshia sentsü tenenya agi "PARNOK KUMZÜKANG!" ta zülur bena liasü.

Taruba hopta United Nations General Assembly nung linük tejangja kar lenirtemi Palestine linük ka agizüka sangdongtsü renemba mapang tang tesüsa mitkar temi amakba ya ajurur. U.K., France, Canada, Australia, Malta, Belgium aser Luxembourg densema linük kari Palestine linük temeja ka sangdongtsü renema lir.

Hokulbarnü sangdong ka nung Portugal indang Foreign Affairs Ministry-ia Deobarnü Palestine linük ka agizüktsü ta ashi. Taoba mapanga parnoki iba sentong ya sangdonga liasü, saka tangbo parnoki anogo atakzüka lir.

Israel mitkari Hamas indang military infrastructure samatsüner ta ashir aser Palestine nunger dang ainshitsü ajungshi, aser tang asendenshir amakba ya mapang telatet maka, saka ita aika agitsü ama lir.

Israel-i ita 23 tashi Gaza nung bomb poklokja amakba nung nisung 65,000 dak tema tepsetogo aser Gaza Strip nung tesem ajunga amai raksaja yangji aliba nisung shilem 90 shi talidak maka tesem balala nung nemzür aser mongin temi Gaza City nung ayawara tenzüka lir ta ashir.

Shifa Hospital indang managing director Dr. Rami Mhanna-i ashiba agi, Honibar anepdang amakba nungi tasü mang kar mozü kidangi bener aruba nung kibong ka nungi nisung trok dena lira ser itemji par kinunger lir.

Israel-i Gaza City nung jenoka aliba Palestine nunger meyirijang aika dang south tsütsüi aotsü ajungshir, koba dang parnoki humanitarian zone ta ajar, aser tan hopta anogo ana atema Gaza City south tsütsü ano corridor ka lapoka liasü.

Palestine nungertem Gaza City nungi gari agi mesüra tetsüng agi jena aor, saka aika ayawara agi kongshir aliba yimti nungi ano ainshitsü memulunger, kar kanga tashi mait mesüra tang parnok aliba tesem yutsür ainshitsü metozüker.

Tang tashi Hamas-i pua aliba kinunger temi Netanyahu aitsür aser "Onok kinungertem azü ya Netanyahu atema yimsüsüba nung alitsü asoshi hadir ka dak alaka kecha mali. Rara ali tashi Netanyahu indang sorkar ka alitsü," ta par kima sangdong ka zünga ashi.

Tang Gaza nung Hamas-i pua bener aoba nisung 48 lir, aser parnok tesadang ka dang tajemba takum lir südi ta amanger. Hamas-i anir telungpur temi October 7, 2023 nü Israel south tsütsü amakdang nisung 1,200 shi tepseter nisung 251 pua bener ao.

UN nuclear watchdog den teka amteper minyaktsü: Iran

Tehran, Rongjui/September 21 (Agencies): India indang security telok tongtibai, France, Germany aser United Kingdom nungeri international sanctions tanaben benokshitsü atema jenjang agiba anema parnoki United Nations nuclear watchdog den teka amteper minyaktsü, ta tekümdangtsü metetdaksüogo.

Iran nem tenokdangba balala agütsür aliba agintsü atema United Nations Security Council (UNSC)-i bangzüng ka meyanglutetba sülen anogo ka lir Supreme National Security Council yagi Hokolbarnü iba tekümdangtsü metetdaksüogo.

Iran nem tenokdangba agütsüshitsü atema Augutst 28 nü nungi tenzüka anogo 30 tashi nung inyakteptsü asoshi Europe nung aliba linüktem yagi jenjang agiba sülen vote agitsü ayongzüka liasü. Iran-i parnok indang nuclear programme azüoktsü atema 2015 küm tenangzüktepba yangluba ama inyaksangshi masü ta shia parnoki tenokdangba agütsüshitsü ayongzüka liasü.

Iba tenangzüktepba nung Russia aser China natia sign süa lir, aser tenokdangba agütsüshitsü atema benokba linük anaprongla yagi magizük.

Iran indang Supreme National Security Council, koba tir Masoud Pezeshkian mendenbuba sür inyaksangshir, parnoki Europe nung aliba linük asem, shirnok dang E3 ta ajar, parnoki agiba jenjang ya junga masadangi agiba ka lir ta shiogo.

Supreme National Security Council-isa, iba jenjang agiba ajanga, Iran nung nuclear inyakyim asadangshi tenzüka international temzüng ozüng sülen tashi anga anidaktsü asoshi International Atomic Energy Agency (IAEA) den ita aika inyaktepba aliba tagidak maka kümdaktsür, ta ashi.

"Islamic Republic of Iran indang Ministry of Foreign Affairs-i IAEA den teka amteper inyaka aruba den nuclear ken o bentettsü atema onük balala benoker liaka Europe nung aliba linüktemi iba jenjang agiba ajanga iba Agency den teka amteper inyaka arua

aliba suspend sütsütsü," ta council-i ashi.

Council-isa, foreign ministry dang linük tejangraba kümzüka ayutsü atema Supreme National Security Council den telemtetba agir aliba kübok maneni sensaksema inyaksangshitsü tetuyuba agütsüogo.

United States aser Israel nati June ita amakba nuclear site tem densema Iran indang nuclear yangludak asadang tenzükshitsü atema iba ita tetenzüklen Egypt yimtiba Cairo nung senden ka amenba sülen Iran aser IAEA na tenangzüktepba ka yangluogo.

Iran indang Deputy Foreign Minister Kazem Gharibabadi-i Iran indang IRIB television dang ashiba agi, diplomacy dak sendakba nung kecha matalokra Cairo nung tawa IAEA den tenangzüktepba yangluba ya ajunga anentsü.

Iran, China, Russia, United States aser E3 nungeri sign asüba Joint Comprehensive Plan of Action (JCPOA) kübok Tehran-i parnok indang nuclear programme tem azüoktsü aser

iba melena Iran nem tenokdangba balala agütsür aliba agintsütsü nangzüktepogo. Ajisüaka 2018 küm US tir Donald Trump-i iba tenangzüktepba nungi atsüngina Iran nem tenokdangba balala agüja liasü.

IAEA-i taküm küm tetenzüklen ashiba agi, Iran ket nung 60 percent purity tashi enrich sür aliba uranium seret 400 dak tema lir, koba weapons grade tera agi dang matong lir.

Iran-i, parnok indang nuclear sentongtem ya raradang amshiba hadir yanglutsü asoshi masü ta nenshia arudar.

Hokolbarnü UNSC nung vote agitepba tetezü tenokdangba ya taruba Deobarnü tashi nungibo benoka inyaktsü akok.

Tenokdangba rongnung Iran anema arms embargo benokshiba, uranium enrichment aser reprocessing nokdangba, ballistic missiles dak sendakba nung inyakyimtem nokdangba aser Iran indang rongsen balala tamshi mejungi kümdaktsüba aser Iran nunger

kar nem senzüsenpongtsü atema tenokdangba agütsüba densema lir.

E3-i taoba mapang, Iran-i UN nuclear inspector tem nem parnok inyakyim asadangtsü melara aser US den sensaksemra tenokdangba agütsütsü aliba ya magütsüi atatsü ta shia liasü.

Tenokdangba balala agütsütsü amokmerenba mapang Pezeshkian-i Honibarnü ashiba agi, par linük nem tenokdangba balala agütsüba parnoki ajangteta aotsü aser linük anemertemi parnok lenmang nokdanga meyutettsü.

"Temulungtetba alirtem aser tejakleni aotsü tashi alirtem nokdanga ayutsü khenyongi tamakoktsü," ta Pezeshkian-i ashi.

US-i teyari agüja Israel-i Natanz o Fordow na densema Iran indang nuclear site tem amakba indang tetshia tir-i ashiba agi, Iran tsükchirtemi item facility tem raksatsütsü merang saka Iran nunger specialists aser scientist temi item ya yanglushitsü.

Iga Swiatek-i Korea Open kokogo



Rongjui/September 21, 2025 (Agencies): Deobarnü Seoul nung Korea Open tetsür kija asaya final nung Iga Swiatek-i asaya junga metenzüketba sülen meyipa tur Alexandrova koka iba asayamung kokogo.

Final nung Swiatek-i 1-6, 7-6 (7/3), 7-5 agi Russia tsür Ekaterina Alexandrova madak takok ngua liasü.

Mezüngbuba set nung world No. 2 asayar yagi junga masayatet aser aibelen aika menaba sülen minute 33 nung dang kokdaksü.

World No. 11 Alexandrova, shibai 2022 küm Korea Open koka liasü, lai tanabuba set nunga anaben tashi asaya terara agi makok saka Swiatek-i süngjemshir asaya-a tanabuba

set ya tiebreak nung koka liasü.

Iba sülen Grand Slam trokben koker alila yagi tajungba asaya tenzük aser winner ka zükokja tasembuba set akok aser iba asayamung koka liasü.

Iba asayamung akokba densema arishi küm 24 tain Poland tsür la yagi taküm asayamung asemubba kokogo aser Seoul nung tang mezüngbuba iba asayamung kokogo. Swiatek tebu Tomasz-a 1988 Seoul Olympics nung rowing nung shilem agi, aser iba indang lai jembia liasü.

"Kübui Olympics mekoktet saka ni iba asayamungbo koktetogo," ta lai menürema ashi. "Taruba küm pa idaki arua shilem agitsü imla atar," ta laisa shisem.

Swiatek-i iba asayamung

nung set ka nung danga tamakok mongui final atong. Lai Honibarnü asaya ana tashi koka liasü. Ajisüaka final asaya nungbo Alexandrova-i kanga junga asaya-a la nem timtem agütsüogo. Tena taküm tang agi pezübenbuba asayaogo.

"Ni asaya koda akokar mejangja, kechiyong nai kanga junga asaya liasü," ta Swiatek-i takok marok agizükba mapang ashi.

Kasa mapang nung Alexandrova-i la tamakok agizüka Swiatek nem tenüngsang agüja liasü. "La den asayatsü temela masü, anungji tanü ni takok tashi tajungtiba asayatsü merangogo. Tanü ni la akoktsüsa masayatet, saka taruba asaya nungbo tajungba asayatetsü imlar," ta lai ashi.

West Indies den Test asaya atema India team yakta sangdongtsü

Rongjui/September 21, 2025 (Agencies): West Indies den kidang Test ana asayatsü aliba atema anogo ka ana tsüingda India team sangdongtsü BCCI renema lir, ta BCCI secretary Devajit Saikia-i Deobarnü metetdaksüogo.

"West Indies den Test asayamung atema India Test team ya September 23 mesüra 24 nü shimtsü. Selection senden ya online ajanga amentsü," ta Saikia-i BCCI headquarters nung osangbenertem dang ashi.

India aser West Indies na mezüngbuba Test asaya October 2 nung tenzuka Narendra Modi Stadium, Ahmedabad nung asayatsü aser iba sülen tanabuba Test ya October 10 nü nungi Arun Jaitley Stadium, Delhi nung asayatsü.

India Test captain tasenba Shubman Gill lenisüba nung team tang mezüngbuba India nung asayatsü lir. Pa lenisüba nung England nung Test asayamung 2-2 nung tembanga, koba 2025-27 World Test Championship cycle nung shilem ka liasü.

Kasa mapang nung West Indies-i asayar tejen Tagenarine Chanderpaul aser Alick Athanaze na team nung züngoksemogo aser left-arm

spinner Khary Pierre tang mezüngbuba anisemogo. Head coach Daren Sammy-i ashiba agi, "Tagenarine Chanderpaul meyipa aruba ajanga top order nung teyari agütsütsü aser Alick Athanaze-ia spin kanga junga asayaba ajanga pa team nung züngoksemogo."

Pierre, shibai West Indies Championship nung wicket 41 agia liasü, pai spin department tashi itshitsütsü imlar. Sammy-i, "Khary tang mezüngbuba team nung second spinner ama züngoksemogo," ta ashi. Left-arm spinner-sa, Gudakesh Motie bo anisüngzükdaksüogo, kechiyong February-March ita T20 World Cup densema limited-overs asayamungtem aika asayatsü lir.

West Indies squad: Roston Chase (capt), Jomel Warrican (vice-capt), Kevlon Anderson, Alick Athanaze, John Campbell, Tagenarine Chanderpaul, Justin Greaves, Shai Hope, Tevin Imlach, Alzarri Joseph, Shamar Joseph, Brandon King, Anderson Phillip, Khary Pierre, Jayden Seales

India vs West Indies

Schedule:

1st Test : Oct 2-6, Narendra Modi Stadium, Ahmedabad

2nd Test : Oct 10-14, Arun Jaitley Stadium, Delhi.

China Masters: Satwik aser Chirag na ano final nung tsükogo



Rongjui/September 21, 2025 (Agencies): India nunger tebur tarep asayar Satwiksairaj Rankireddy aser Chirag Shetty nati Deobarnü China Masters badminton asayamung tebur tarep asaya final nung Korea nunger Seo Seung Jae aser Kim Won Ho na mekoki tanabuba jenjang nung tembangogo.

Shenzhen Arena nung top-seeded Korea nunger tarep Jae aser Kim nati final asaya nung India nunger tarep ya 21-19, 21-15 agi koka liasü.

China Open nung Rankireddy aser Shetty nati mezüngbuba asaya nung

Malaysia nunger Arif Junaid aser Roy King Yap na 24-22, 21-13 agi koka tenzük aser iba sülen Round of 16 nung 21-13, 21-12 agi Chinese Taipei nunger tarep ka ayong ayonga koka liasü.

Rankireddy aser Shetty nati maneni kanga junga asaya-a quarter final nung 21-14, 21-14 agi China nunger asayar Xiang Yu aser Xie Honan na akok aser semifinal nung Malaysia nunger Aaron Chia aser Soh Wooi Yik na 21-17, 21-14 agi koka liasü.

Tena taoba hopta-a Hong Kong Open final nung tsük aser taküm mezüngbuba asayamung

akoktsü atema meranga asaya aliba mapang China nunga final nung tamakok nguogo.

Ajisüaka top-seeded Korea nunger tarep Seo aser Kim na ya India nunger tarep asoshi jungrara liasü aser tenati asaya kangabo timtem mesüi akok.

Satwiksairaj aser Chirag na taküm tang agi tanabenbuba final tongogo, aser taoba hopta Hong Kong Open makokba sülen China nungbo takok angutsü imla liasü, saka alizüng metongtet. Tena hopta ana tsüingda final ana asayaogo.

Hong Kong Open final nung tena ya China nunger tarep Liang Weikeng aser Wang Chang nati 21-19, 14-21, aser 17-21 agi koka liasü. Satwik aser Chirag nati iba asayamung nung China nunger tarep Xiang Yu aser Xie Haonan na 21-14, 21-14 agi koka final tonga liasü.

Maneni tenati August ita-a World Championships nung bronze medal nguogo, koba küm anabuba atonga iba asayamung nung bronze medal anguba liasü. Tenati taküm Badminton World Federation (BWF) World Tour ka danga koka mali, aser taoba küm May ita Thailand Open akokba ya tena asoshi tesüsabuba asayamung akokba lir.

Anandkumar-i 42Km marathon speed skating title benogo



Rongjui/September 21, 2025 (Agencies): India nunger skater Anandkumar Velkumar-i otsü tasen yanglua Deobarnü World Championships nung 42km Marathon speed skating event nung gold medal nguogo.

Velkumar, shibai kasa asayamung nung 1000m nung gold aser 500m event nung bronze medal ngur liasü, pai ano alizüng tasen ka tongtetogo.

Velkumar-i iba hopta Beidaihe, China nung World Championships asaya nung 1000m event nung gold medal ngua pa ya India nunger rongnungi speed skating nung mezüngbuba world champion aküm.

Arishi küm 22 tain asayar ya par ki anasa cement badminton court nung asaya

tenzük aser iba mapang speed skating nung temaba jenjang tonga asayatsü imla maliasü. Pai iba tesem nungi temaba jenjang tonga meranga inyakogo.

Velkumar-i 2021 küm Junior World Championships nung silver medal ka ngua pa ya India nunger rongnungi iba jenjang nung medal ka anguba mezüngbuba asayar aküm. Taküm küm tetenzüklen paisa, alizüng tasen ka tongteta World Games nung bronze medal angu aser iba asayamung nung India nunger skater tem rongnungi mezümbuba medal ngua liasü.

China nung tang asaya aliba World Championships nung pai mezüngbuba 500m sprint nung bronze medal angu aser iba sülen anogo ishika lir 1000m event nung gold ngua liasü.

BILEMDANGANG

"Tamagitsü o aika jembiba dang nungibo tagitsü o ka jembiba tajungba."